

重校
箋註

錢牧齋全集

九

初學集卷二十七

牧齋全集第一種

虞山 錢謙益 牧齋 撰

雜文七

富責主人文

昔人逐貧送窮之作皆以貧鬼致辭譴訶不少貸而富鬼則不及焉孫樵逐痞鬼文列四鬼之目曰諂鬼曰矯鬼曰巧鬼曰錢鬼是四鬼者皆富鬼之族類儔黨也樵既知富鬼之情狀而擬諸其形容矣又欲招之以文富鬼故不好文幾其與子墨作緣亦愼甚矣乎余里居食貧峭獨自憇時聞大冠擲揄聊述其語爲富責主人文知富鬼之不可招故安于其責而不慙也意略與樵反其辭曰翰林主人索居暑夕月在南斗明河垂席雲物輕鮮人影單隻倚杖徬徨瞻睇四壁有聲愀然若咳若息若啼而厲若愬而謐謐喜出出音聲四射傾聽不明掩耳逾噴曰余爲富鬼百鬼之王暫舍富室薄游窮鄉過子之門有如琢冰門

神冷落戶鬼凌兢入子之室徒有憂滿竈君辭突厠鬼去溷退筆成家殘編滿
家傲不人後癖必人過撫己咄咄視天夢夢保此四極御彼五窮凡今之人莫
如富厚百爾具瞻上帝所右鬼猶求食人胡弗走不親而懿匪昏而媾借其餘
光逐彼遺臭彼翔我趨彼植我偻彼噉我甘彼灼我爇衍衍飲酒仡仡禦寇惟
力是視遑恤我後我有顏面無獲其皮劈眚析頰逢彼之宜彼笑未色我解其
頤彼方曰咨我蹙其眉賜之餘瀝匍匐叩稽不比臣虜况乃等夷我有話言杳
口岐舌鴟夷滑稽瀾翻轉折嚶嚶嗚呼附耳未絕陳見惻誠誓死流血退而屏
人偶語憂憂轉喉似暗出氣復咽哿矣富人入而後說爲臣則忠作婦斯哲齒
牙輓轡骨節鬱卷口承餘竅唇嚙足汗尻高首下肩聳脇穿剜肉折俎剝膚肆
筵見金則攫有恥必捐子不醜窮人誰子妍脂膏却潤捷徑辟先人敝官冷有
地無權資人莠口博人鈍顏搖唇抹殺背面銛鉗魯冠越棄夏箴冬懸咎譽遷
隨彼何有焉富而可求伐柯有則彼其之子亦既弋獲善事官長伺候顏色結

交駟獐厭飫酒食妻子踴慮僮奴并力如牛之耕如螽之賊囊橐充牣子貸滋植大冠如箕項領成飾鄉老稱愿兒童嘆息子胡自苦坎壈失職用我之言易子之求迴馭弭節師彼前修鴈鶩爲羣稻粱是謀擲揄屏息樓裂奚憂儻置筆札辭去交游願就幸舍爲子持籌主人聞之閔默隱几煩冤填臆唧嘈聒耳宿醉方醒夢寐未止回腸傷氣屏營徙倚曙光解駁晨露沾灑欠伸久之晞髮叩齒左顧丹鉛右命圖史忻忻樂康忘其所以富鬼喟曰不可爲矣撫膺高蹈不顧而起

楚女對

楚之南有季芊者美而惠弱不好弄善女紅授女誠列女傳書笄而適于某氏不苟訾笑久之舅姑弗善也其叔妹妯娌咸疏遠之其夫憐之而弗敢暱也里有夏巫氏者極醜無雙白頭黝顏深目曷鼻齟唇結喉旁行蝸僂手不識刀尺目不辨結縷倮逐與人合無道涂溷廁擇焉行年五十而後嫁好淫不衰其夫

固知之久之其舅姑安之其叔妹妯娌交譽之其夫亦弗忍絕也夏巫氏時引鏡自笑曰吾之美與惠世固無有季芊何爲女子有辭家者過夏巫氏夏巫氏必祀之曰肖我肖我而笑詈季芊不絕口鄰女有習夏巫氏者問之曰子固里之不售女也子何賢于季芊夏巫氏曰我善嫁隣女曰季芊實先子行何謂善嫁夏巫氏曰非此之謂也季芊之嫁也一嫁而已矣善嫁者無不嫁也里之人貴顯者吾嫁門第焉富厚者吾嫁貲焉賈者吾嫁鬻販焉飯脂洗削者吾嫁奇美焉傭保吾嫁直焉奴虜吾嫁桀黠焉椎剽賊盜吾嫁藏焉丐乞吾嫁殘羹餘瀝焉吾十指如懸錐而衣食常有餘且以參吾舅姑叔妹而盡吾夫焉季芊之一嫁也此不嫁之精者也故曰我善嫁隣女曰然則子何以無淫名夏巫氏曰我善淫我非好淫也汚其身有利于已則爲之也利我者以我專利也不好淫淫我者以我端淫也不謀利我是以食淫利無淫名且里之人老者吾假女焉孤孩者吾假母焉壯者吾假兄弟焉皆假物也向者吾嫁亦假也吾有淫黨而

無淫人誰適名我故曰我善淫隣女曰是二者則誠善矣如醜何夏巫氏曰頭白因而爲廣髻顏黝因而爲玄衣因深目而視下因曷鼻而眉蹙齟唇結喉因而爲囁嚅旁行蝸僂因而爲磬折人惠我而愛其醜也久而漸忘之且歸美焉季芊洵美矣雖然季芊不善爲美而我善醜以我之善醜易季芊之不善美則季芊之稚齒矮嬌猶天人也雖鳴之發于餘竅猶芷若之紛郁以口承之不暇矧敢笑且詈之耶隣女歸以告季芊季芊穆然不應楚王聞之曰嘻是國之無教令也乃命施夏巫氏表季芊之閭以爲女宗

書武林禳夷事

今年春王師分四道討建州夷三道敗沒殺我一僉事二總兵中外大震武林諸山浮圖有律行者相率然燈禮懺告哀于佛諸大夫士相焉或曰是詛之也秦嘗詛楚王熊相是匹敵之禮也或曰非詛也禳也禳之之義何居周官大宗伯六祝六祈則掌之太祝候禳禱祠之祝號則掌之小祝以迨于司巫女巫巫各

有事守凡以寧風旱彌災兵國有大故號呼于神以求福也夫周禮者周公致
太平之書也當周之盛時天子穆穆諸侯皇皇六卿分職各率其屬時和年豐
天無烈風陰雨白雉鬯草之貢至自荒服國固無風旱戕兵之足虞其有之則
其所召致感應者不在人也是故一則曰以事鬼神而再則曰以同鬼神而德
之休明人無不和而天神人鬼地祇或有不同不和則六癘之自作聖人得以
索而治之然而用牲用幣祈禱告哀不敢專用攻說從事求乎陰之道也治世
浸遠五行之沴滋多風旱災兵劫運促數而大雉氏之教始盛其所以弭災拯
難升幽陟明固不遠于周官之法則亦聖人所不廢也今天子深居法宮久道
化成建州一隅伏屍流血干犯和氣六癘之自作不歸于人鬼天神地祇之不
同不和而誰歸與周官之制度蕪廢候祈禱祠之法已不可攷見不告于大雉
氏而誰告與雩祭之用女巫也歌哭而請今建州之戕豈直旱暵與浮屠之禮
懺也其唱嘆不比于歌其悲哀不比于哭與舉國之人皆莫適爲女巫而浮屠

焉代之是不亦亡于禮之禮與然則大夫士之相之也何居曰吾聞之浮屠有護真者瓦盂草食守木义如金科斯律行之表也率護真之道以之爲臣必不以持祿養交罔上以之爲長必不以苞苴竿牘漁下以之立朝必不以諂訛噂沓賣友雖棄氏毀髮固天子之寶臣也大夫士之相之也宜或曰是舉也大夫士請之浮屠鑒其誠往焉爲大夫士者里居而抱疆場之憂匍匐稽顙告哀于佛其進而謀人之軍師邦邑又何如也侯喜者唐之處士也劉逸淮之亂作弔汴州文投之大川以訴李翱曰誠之至者必上通上帝聞之劉逸淮其將不久後數月劉逸淮竟死然則佟夷之死且亡其有日矣書其事以俟之萬曆己未夏四月

節婦文氏旌門頌

有序

洪武七年春三月甲午詔旌吳縣民妻守節者三人姚榮三妻黃氏旌門在吳縣之閭門里具實錄中後二百四十二年吳縣有姚節婦文實榮三七世孫汝

轍之妻巡按御史請得表署其門如黃氏制曰可于是符下有司行事所旌門亦在閭門里綽楔相望焉文之隕所天也爲萬曆庚辰子希孟生十月乳哺之餘掖置苦次麻與襁相襲也希孟少病嗽齒擊乳迸迷離枕席閒不辨血渾中更家難覆巢完卵艱危萬狀萬曆乙卯孀居三十有六年與被旌典希孟旣以春秋舉於鄉有聞望矣姪烈則繡黼振賢則珪璋煌煌乎圖史之遺則聖朝之盛事也黃之被旌故史臣蘇伯衡作旌門頌旌門之有頌古無聞焉自伯衡昉也其亂曰嗟臣事君猶婦從夫凡百在位曷鑒曷圖伯衡當開國初去僞吳僭竊未遠其告誡臣子者甚備承平以來偷玩滋有惟茲閭門通邑大都秉軒列騶過姚氏之宅里者道相逮也其亦有下車肅揖攷舊史之訓辭而興起者乎謙益待罪國史謹書其事以遺希孟俾鑠之樂石猶伯衡之志也頌曰我祖建國崇獎節孝神孫十葉風聲彌耀徵節于吳有黃有文崇臺綽楔後先一門龍宗有鱗鳳集有翼維黃自誓文也是則是則伊何忍死立孤哀哀苦塊襁褓是

扶哭摧蒼天泣掩黃口吳趨罷歌闔廬崩耦哀此藐孤命比垂髮含飴難淚嚙
乳迸血靡晨匪昏靡令匪冬寒燈晝青朔雲夏同厥孤漸長維母作傳教之春
秋昂以匕箸鴻匹不再豹生有文是母是子達于九閭帝曰俞哉媿女前烈漆
書交映烏頭雙揭戕戕闔門甄胄之里軒車麟麟有來至止覩彼赭白問諸琬
琰豈無轅迴亦有顏渙嗟此婦嫠朝蠶莫鹽旌門有仇過者具瞻天咫不遠皇
匪爾私載高食厚云胡弗思匪瘴曷章匪誅曷封訓於蒙士式彼女宗曷鑒曷
圖莫非臣子載筆作頌敬嗣舊史

節婦韓氏旌門銘

有序

崇禎三年吏部文選清吏司郎中臣必顯言臣曾祖父元祖以諸生早夭曾祖
母韓氏年二十有八毀容截髮瀕死自誓力作以奉舊姑血淚以育孺子茹荼
攻蓼五十餘年州里言其狀監察御史將覆覈上請家本衛籍衛弁來索賄家
人欲予之韓嚙指曰吾誓死守節若以賄得旌是毀吾節也乃罵絕之且死戒

子孫勿復言旌表事臣祖承光累年外吏臣父振基數月省垣未獲具疏陳請
臣遭逢聖明待罪銓部敢昧死上聞伏惟陛下鑒百年之苦節閔三世之死孝
幸得表署其門如制令其自臣祖父以下咸死且不朽制曰可於是草莽臣謙
益舊待罪太史氏謹爲之銘銘曰巖巖衝關下有渚水注河激華龍門伊始神
區帝戶風氣完塞彼都士女淑茂厥德有美韓姑來歸于孫嚴霜夏墜所天不
存雙雙華顛呱呱襁褓閔子幼稚哀彼篤老寒燈雨侵敗幃風擁哀哀血淚迸
爲乳湏厥孤旣立母節未著伊誰抑沒韎韐附注民彝有常天咫不遐挹彼注
茲發祥厥家子應星郎孫拜夕闈曾孫趾美前光後輝乃扣帝闈抗疏請卹帝
曰俞哉汝表汝錫崇臺綽楔銀榜漆書天晶日明炤曜里閭冥冥長夜墓木已
拱寒灰琯飛重泉波涌皇明如日靡幽弗燭孰云百年蔽此蔀屋誰謂華高母
節齊而誰謂渫遠母節逝而誰謂衝關峻不可仰烏頭雙表遠抗高掌舊史作
銘勒諸樂石崇獎節義用詔罔極

新安呂氏節孝旌門銘

崇禎十五年闖賊陷雒陽故南京參贊尙書呂公維祺被執抗辭罵賊而死余從故篋中得公所詒先世節孝事狀摩挲流涕追惟宿諾乃爲敘而銘焉敘曰節婦牛氏河南府新安縣介村里人呂鄉妻也鄉死時年二十九闔戶自經女弟救之得免家貧子稚隣媼憐而諷之嫠面截髮以死自誓篝燈紡績聲淚奄然泣涕漬濕麻桌日亭午突蕭然無煙終不肯匄貸一錢曰與人通財非嫠婦事也子孔學貧不能爲儒習書獄爲縣吏文無害能佐縣令平反孫維祺舉進士官吏部郎呼孔學謂曰夫子好行其德指困以周人之急而家輟火里人靳之曰無若呂公代客用窮今幸少有餘貲盍亦行夫子之志乎孔學傾家以贍三族澤及窮嫠母之教也牛氏卒壽七十有八孔學老矣號踊致毀苦次病亟子婦以酒肉進終不肯御家廬沍寒風饕雪虐人勸之歸不可曰我先人葬母身自負土手皴足重繭我以孺子故弛於畚築又忍燕寢居息棄吾母於宿莽

乎里人言母病腫瀕死孔學籲天請代感異夢遇異人診之一昔而起兒童婦女爭傳其事皆曰呂孝子也天啓四年御史丘兆麟上其狀禮部案驗不妄奉詔表厥宅里曰旌表故民呂鄉妻牛氏貞節及呂孔學孝子之門母子節孝同日並旌史策所罕聞國制所未有也旌門之後凡十九年而有參贊公死節之事銘曰惟皇建極崇獎節孝樹之風聲顯顯呂氏母子婦孺篤守天經栢舟之節白華之孝旁達神明一門雙闕烏頭漆書燭幽洞冥神錫祕祉靈泉神芝誕育夏卿雒邑隳突天虧地圯親賢在庭食竭力盡抗辭談笑獲此利貞肝膽輪囷碧血不化鬱爲神靈雒陽城下思鄉之夢遄歸帝京節婦有孫孝子有子惟我有臣天包元命國叶貞符純嘏合并即圖立廟帝命洊加揚芳億齡金銷石泐汗青凜然敬斲斯銘

金節婦錢氏旌門銘

并序

崇禎八年巡按浙江御史臣某言紹興府山陰縣民金某妻錢氏年十八歸於

金二十三而寡一女提一子抱截髮殘面矢志自誓衰麻與襁褓相襲也血淚與乳渾相和也久之紡績以課弱女修脯以教稚子籲天刲股以療病姑茹荼攻蓼克有完節萬曆四十七年卒年五十三謹按節婦錢氏後門寒素伶俜孤苦俯子仰姑捐身并命用能報稱所天全歸下地所謂之死靡它復生不愧者也臣牒下所司案驗不妄請得表署其門如會典制曰可後三年節婦之子廷策謁謙益於請室請爲旌門之銘銘曰旌門之典備於有唐逮我國家甲令煌煌烏頭雙闕綽楔嶙峋勸爲人婦勸爲人臣惟皇御極崇獎節孝金寡高行門閭有耀高行維何誓死報夫血漣育子殘肌療姑金銷石泐丹誠不改琢冰積雪四十餘載鴻孤行單鸞孤影隻相彼禽鳥有耦有匹鳥鼠同穴靈狸互雄人而無恥孰長保蟲閹孫塞路媼子盈朝螺肖蜾蓄廉恥道消持祿鉤黨如弗我克國邑軍師棄比遺跡皇匪爾寵爾詢爾辱小刑刀鋸大刑爵祿多壘蹙國泄泄降災爾之弗圖亦已焉哉惟此庶婦習禮蘊義送往事居鞠躬盡瘁惟婦殉

家惟臣耆國三事大夫云胡弗盡崇臺有仇表厥宅里帝庸勸節亦以明恥莫
聖匪白莫敷匪丹悛者停車赧者頽顏纍臣謙益舊太史氏作爲銘詩敬告卿
士

雙節堂銘

并序

永樂初常熟民朱昌朱亮應詔徙家京師兄弟相繼歿昌婦錢亮婦陳皆盛年
自誓鞠其遺孤曰良曰鉉皆克有成鉉中進士拜御史奏旌其門閭爲堂號曰
雙節倪文僖諸公爲記傳胡忠安商文毅諸公爲詩與頌而前塘戴進爲之圖
此天順閒事也耳孫某出以示余余拜而展視絹素完好風烈如在因念二節
婦之歿二百餘年所謂雙節堂者缺瓦斷礎不可復跡矣而觀者拱手歛容如
二寡之危坐於此堂而肅揖其下也天地閒物無不敝惟節義爲可久是故殘
肌斷脰者彌痛而忠臣節婦不替於世爲之銘曰二寡高行萃於一堂輕裾齊
縞朱顏並蒼秋稗同炊寒燈互影呱呱二孤血淚填哽鴻節旣伸熊丸有託惟

此崇構御史所作素椽粉板二百餘年我披畫圖有風肅然霜棲舊礎月澹上楹恍見二嫠栗玉堅冰悍夫俯躬譁者不語搢衣趨風欲拜堂下三槐之堂駟馬之門棟宇翬飛今則焉存石泐却灰節義不隊歸然斯堂亘古常在

義冢碑銘

虞山之北繇天潭谷邇迤而下林麓蒼蔚後崗而面城凡五十餘畝買之置義塚焉廣二百五十七步修如廣之數而贏十八國民無私地域者與夫死於道路者則以告族而埋之參政陸君仲謀實爲經始請於邑宰張侯溝封之而申其禁令謙益謹書其事系之銘詩以告後之人俾勿壞銘曰帝奠九壠濟於壽仁厥類不齊扎瘥夭昏邑厲有祀漏澤有園掩骼埋胔豈惟孟春其一維茲都邑民人所戾極熾而豐氣亂作癘道路不掩溝壑斯斃莫司置榻莫掌除飢其二白骨拊柱青燐斷續瘳狗晝噪饑烏夜啄胔臂日燎駸股雨濯痛湛淵泉臭達墻屋其三風淒晝日魂語道周天寒雨濕有聲啾啾豈無蓋帷亦有首丘悍夫涕淚

仁人以憂

其四

虞山之陰天潭之陽爲扈爲嶧如防如牆宮以墮山襲以脊岡畫

丘繞還近郊莽蒼

其五

乃捐泉布乃植封樹乃給輶櫜乃族墳墓以葬以貍以表

以署旣度以畝又度以步

其六

山則再成地匪不食纍纍者墳不見白日昔無席

薦今有寢室革其呻喚歛彼魂魄

其七

告於邑宰宰曰禕矣蒯鮒慮終樵牧禁始

爰命山虞以及蜡氏部分林麓昭示無止

其八

凡此捐瘠皆我族類我心盡傷非

作而致不甞不卵澤有攸漑如水斯灋如火出燧

其九

大書深刻載此銘詩凡百

君子過而眡之梧丘垂仁射聲流滋岸頽城復斯冢勿夷

其十

第五公畫像贊

第五公者周姓諱召詩字二南鎮江之金壇人也兄弟五人皆射策甲科登膺仕公獨老逢掖行又第五遂自號第五人稱之曰第五公丙丁之交掾人竊枋其爲之冢宰者第五公之伯兄也第五公詒書強諫弗聽登明倫堂伐鼓號哭褫諸生之巾衣以歸未幾而卒後十餘年其子簡臣介生蔚爲儒宗件繫公行